

YOUPALTUBO

1 milion di visualizacions pal canâl Youtube "Made in Friûl"



A l'è saltât fûr passe 2 milions di voltis tes ricercjis e tai suggeriments, al à vût un milion di contats – ven a stâi 34.500 mil oris di visualizacions – e plui di 10 mil iscrits: a son chescj i numars straordenaris di **YoupalTubo**.

Il **canâl YouTube Made in Friûl**, promovût de ARLeF – Agenzie regionâl pe lenghe furlane, al va indenant a cressi e lis musis dai siei protagoniscj a son simpri plui cognossudis sedi in rêt che fûr dai schermis.

Cuntun video daûr di chel altri i zovins *youtubers* furlans pôc parsore dai vincj agns – il grup originjâl fat di Lucia Bello, Federico Benedet, Davide Buccheri, Mattia Cantarutti, Francesco Colombino, Federico Iob, Diego Scarsini, Fabio Valvason, e i doi ultins "acuiscj" Nicolas Fonzar e Desiree Chiappo – a inmagnin un public simpri plui grant e larc. Parcè che lis filis dai lôr fans, di là dai coetanis, a van dai fantacins under 16 ai *boomers*, che a àn za passât di un pieç i 40. Merit de lôr ande lizere e curiose, buine di contâ e divertîcui che ur sta daûr, fasint cognossi lûcs, storiis e events dal Friûl. Propit il tratâ temis diviers cun formâts diferents – i canâi YT par solit a son monotematic – al è un altri ingredient dal lôr sucès.

Une popolaritât che ju à puartâts ançe fûr dal schermi e in tour pal Friûl. Nol è tant che a son stâts protagoniscj de prime edizion di Dixit, la rassegne dedicate ae comunicazion digjitâl che e à clamât dongje a San Denêl une vore di creadôrs di contignûts innomenâts di dute la Italie. A son stâts propit i fantats di YPT a vierzi il festival. Une siele volude cun fuerce dai organizadôrs parcè che "cuant che si fevele di digjitâl, no si pues imaginâ l'avignî se no si à cussience des propriis lidrîs, e i fantats di YoupalTubo, cui lôr contignûts, a son la rappresentazion miôr di ch'est te nestre regjon".

Il festival al è stât une ocasion impuartante par contâ dal vîf la lôr esperience, lis passions condivudis doprant la lenghe furlane e ce che al capite daûr des cuintis di cheste aventure digjitâl. Propit sul palc dal Teatri Splendor, al è stât disvelât il gnûf format dal canâl "Mangjâ e murî". Ma lis vôs a spiin altris novitâts impuartantis e presincis sul teritori par YoupalTubo e i siei protagoniscj. Duncje, cemût che si dîs sul web, "Stay tuned!", ven a stâi, "Restait sintonizâts!".